

LA USC DI LADINS – VENERDI' 31 MAGGIO 2019

PROJEC

Condivijion, reflescion e divertiment con La Risola

Chest uton ponta demez doi percorsc neves che se met dant de fèr crescer i bec dal pont de veduda personèl e sozièl. De jugn taca ence n laboratorie de fotografia

L'è avert la enscinuazions ai projec 2019 del Pian Joegn de la Risola. Dò l bon ejit del 2018 del projet TEAnTER, la sociazion Inout porta



L logo de La Risola.

dant te chest chèder doi percorsc neves che tacarà d'uton ensema con la scola, che enterzarà momenc de condivijion e reflescion a spazies de divertiment san per soscedèr talenc e sensibilitèdes, con l'obietif de la crescimonìa personèla e sozièla di bec de Fascia.

“Sutar per aria” l'è n projet per joenec e joegn dai 11 ai 25 egn che

mesceida l'acrobatica aerea e l parkour con laboratorie de reflescion su la dependenza da video games per ge dèr l met de se arvejinèr a disciplines che les i stimolee e les i mete a la proa sul pian fisich. Fajan pirles, sutan, rampean, se tegnan su un co l'auter i bec pel sperimentèr neva sensazions e n nef ambient, l'aria.

Tedant a situazions fora de anter i pel svilupèr sia creatività e madurèr neva idees e pascions. L projet perveit ence momenc de reflescion su la problematica de la dependenza da video games vidè da esperc de la Coprativa Le Rais, con l'idea che stèr ensema, spartir fadies e suzesc, strenjer neves leames sie l prum remedie.

Anter otober e november l'è pervedù 5 scontrèdes con esperc e autres 3 su la dependenzes. Vegnarà ence endrezà momenc per stèr ensema n legreza e alenament per

fissèr conzec e svilupèr l'unità del grop. A la fin sarà 1 o 2 dis de convivenza con chela de realisèr n spetacol sui argomenc tratè. L cost l'è de 30 euro, pel tor pèrt no più che 25 bec con enscinuazions inant di 7 de jugn. Per info e iscrizions scriver na mail a circensema@gmail.com o chiamèr Martin Pederiva al numer 331/8424531.

“Cianton da marevea” l'è n projet per bec dai 14 ai 24 egn en colaborazion con la Parochia de Poza, la Fondazion Giovanni Paolo II de Firenze e la scola de musega Il Pentagonumma. Estra che miorèr la competenza del ciantèr, l projet vel sensibilisèr i joegn e la comunità fascèna su la situazion de la Siria. N talent desche l ciantèr pel doventèr n strument de reflescion e de pèsc e sostegnir l renasciment de la comunitàdes sirianes, seghitan a viventèr l leam con Fascia.

L percors enterzarà lezions de ciantèr con Gisella Ferrarin a laboratorie de reflescion con esperc e testimonesc de la Fondazion. L'esperienza se serarà sù con na full immersion con musica live e doi spetacoi, un a Firenze e un te Fascia, olache vegnarà regoet fondi per la comunitàdes en dificoltà del Medio Orient. L cost l'è de 50 euro, pel se enscinuèr no più che 12 bec inant di 7 de jugn. Per info e iscrizions scriver na mail a ciantondamarevea@gmail.com o chiamèr Melany Locatin al numer 366/3729044.

Estra che i projec de Inout, dai 10 ai 14 de jugn pontarà via ence n laboratorie de fotografia, “Sulle tracce di Franz Dantone”, out a joegn anter i 11 e i 30 egn per endrez de la sociazion Antermoia. L cost l'è de 30 euro e ge vel se scriver ite inant di 4 de jugn. Per info associazioneantermoia@gmail.com.

TZ/CRIM